

კოლეგების გახსენება

გიორგი (გია) კორძახიას ხსოვნას
(08. 09.1947—29.10.2025)



გაუსამლისად მძიმეა იმის აღქმა, რომ აღარ არის ჩვენს გვერდით ერთ-ერთი გამორჩეული ქართველი მეცნიერი, უმაღლესი პროფესიონალიზმით, თავმდაბლობითა და კეთილშობილებით გამორჩეული ადამიანი — გიორგი (გია) კორძახია.

გია კორძახია დაიბადა 1947 წლის 8 სექტემბერს. წარჩინებით დაამთავრა თბილისის 42-ე ფიზიკა-მათემატიკური სკოლა, რის შემდეგაც სწავლა განაგრძო თბილისის სახელმწიფო უნივერსიტეტის ფიზიკის ფაკულტეტზე, რომელიც 1970 წელს თეორიული ფიზიკის სპეციალობით დაამთავრა.

მეცნიერებისადმი სიყვარულმა და შრომისმოყვარეობამ იგი ჰიდრომეტეოროლოგიის სფეროში მიიყვანა — სფეროში, რომელსაც მთელი თავისი ცხოვრება მიუძღვნა. 1975 წელს მსოფლიოში ერთერთ აღიარებულ საბჭოთა კავშირის ჰიდრომეტეოროლოგიურ ცენტრში, მოსკოვში, წარმატებით დაიცვა საკანდიდატო დისერტაცია მეტეოროლოგიური პროცესების ოთხგანზომილებიან მოდელირებაში და ფიზიკა-მათემატიკის მეცნიერებათა კანდიდატის ხარისხი მიენიჭა.

გია კორძახიას მრავალწლიანი მოღვაწეობა დაკავშირებულია ამიერკავკასიის ჰიდრომეტეოროლოგიის ინსტიტუტთან, სადაც მან გაიარა გზა უმცროსი მეცნიერი თანამშრომლიდან ლაბორატორიის გამგემდე. 1997 წლიდან იგი მუშაობდა საქართველოს გარემოს ეროვნული სააგენტოს ჰიდრომეტეოროლოგიის დეპარტამენტის უფროსის მოადგილედ და ხოლო ბოლოს სააგენტოს უფროსის მრჩეველად. იგი პარალელურად მუშაობდა ტექნიკური უნივერსიტეტის ჰიდრომეტეოროლოგიის ინსტიტუტში და განაგრძობდა სამეცნიერო საქმიანობას.

მისი სამეცნიერო ინტერესები მოიცავდა ატმოსფერული პროცესების დინამიკას და მოდელირებას, კლიმატის ცვლილების ფიზიკურ და გლობალურ ასპექტებს, გარემოს დაბინძურების პრობლემებს, ჰიდროლოგიასა და გლაციოლოგიას. განსაკუთრებული ადგილი გია კორძახიას ნაშრომებში მყინვარების შესწავლას უკავია. იგი ხელმძღვანელობდა არაერთ მნიშვნელოვან ეროვნულ და საერთაშორისო პროექტს, მათ შორის შოთა რუსთაველის ეროვნული სამეცნიერო ფონდის გრანტებს — „საქართველოს მყინვარების ელექტრონული ატლასის“ შექმნისა და მყინვარების დეგრადაციის კვლევის მიმართულებით. ამ გამოკვლევებში პირველად რაოდენობრივად შეფასდა საქართველოს მყინვარების დეგრადაცია გლობალური დათბობის გავლენით. მან თავისი დიდი გამოცდილებით და თავდადებული საქმიანობით დიდი წვლილი შეიტანა ჰიდრომეტეოროლოგიის განვითარებაში.

გია კორძახია აქტიურად მონაწილეობდა მსოფლიო მეტეოროლოგიური ორგანიზაციის, გაეროსა და ევროპის სამეცნიერო პროგრამების მრავალ პროექტში, არაერთ საერთაშორისო ფორუმზე წარადგინა საქართველოს სახელით მნიშვნელოვანი სამეცნიერო შედეგები. მისი ავტორობით გამოქვეყნებულია 150-ზე მეტი სამეცნიერო სტატია და 3 მონოგრაფია.

მისი გამორჩეული ღვაწლი აღიარებული იყო სახელმწიფო ჯილდოებით — დაჯილდოებული იყო საქართველოს მთავრობის ორი ღირსების მედლით. იყო საქართველოს ეკოლოგიურ მეცნიერებათა აკადემიის აკადემიკოსი და ვიცე-პრეზიდენტი.

ჩვენ მისმა მეგობრებმა და კოლეგებმა დავკარგეთ მაღალი დონის პროფესიონალი, ნამდვილი ინტელიგენტი და კეთილშობილი ადამიანი, ხოლო ოჯახმა არაჩვეულებრივი მეუღლე, მამა, ძმა და ბაბუა. ღმერთმა აცხონოს და დალოცოს ბატონ გიორგის (გია) უკვდავი სული და ღმერთმა დააწესოს იგი, სადაც მართალნი განისვენებენ.

ანა გიორგიშვილი
(20.09.1943 – 01.05.2026)



მიმდინარე წელს სტუ ჰიდრომეტეოროლოგიის ინსტიტუტის კოლექტივს გამოაკლდა ღვაწლმოსილი თანამშრომელი ანა გიორგიშვილი.

ქალბატონი ანა დაიბადა 1943 წლის 20 სექტემბერს ქ. თბილისში. სკოლის დამთავრების შემდეგ სწავლა განაგრძო თბილისის სახელმწიფო უნივერსიტეტის მექანიკა-მათემატიკის ფაკულტეტზე, რომლის წარმატებით დამთავრების შემდეგ, 1968 წლიდან სიცოცხლის ბოლო წუთამდე ერთგულად ემსახურა ჰიდრომეტეოროლოგიის საინტერესო მეცნიერებას. სხვადასხვა დროს იგი მუშაობდა ღრუბლების ფიზიკისა და შემდეგ ბუნებრივი გარემოს დაჭუჭყიანების მონიტორინგისა და პროგნოზირების განყოფილებებში წამყვანი ინჟინრის თანამდებობაზე. ქალბატონი ანა გამოირჩეოდა მაღალი პროფესიონალიზმითა და საქმისადმი დამოკიდებულების უდიდესი პასუხისმგებლობით. მან მიიღო მონაწილეობა საქართველოს პირველი და მეორე ეროვნული შეტყობინების-კლიმატის ცვლილების შესახებ გაეროს ჩარჩო-კონვენციისადმი ტომების მომზადებაში. რა საქმისთვისაც არ უნდა მოეკიდა ხელი ანას მას ასრულებდა უდიდესი პასუხისმგებლობით და მაღალ პროფესიულ დონეზე. ჩვენი ანა ამავე დროს იყო საოცრად გულისხმიერი, კომუნიკაბელური და ერთგული მეგობარი. მისი ყურადღება ერთნაირად ნაწილდებოდა ყველა თანამშრომელზე მიუხედავად რეგალიებისა.

ანა გიორგიშვილის ღვაწლი შესაბამისად დაფასდა მრავალჯერადი მაძლობით, იგი დაჯილდოებულია ღირსების ორდენით და საქართველოს ტექნიკური უნივერსიტეტის ოქროს მედლით.

ჩვენი კეთილი, მომღიმარი, ყურადღებიანი და უანგარო მეგობრის - ანა გიორგიშვილის ხსოვნა მარად დარჩება ჰიდრომეტეოროლოგიის ინსტიტუტის თანამშრომელთა გულებში.